

Date – 11/11/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Dampa Assembly bial ah boruak muanawm tak hnuiah vote thlak a ni a, vote tla zat hi zaa 80 a chuan rin a ni.
2. Dampa Bial Bye-election vote thlak ni vawiin khan Political Party hrang hrang ten tlin ngei an inrin thu an sawi hlawm a ni.
3. Bihar Assembly inthlan thawhnhnihna tluang taka zawhfel ani.
4. Prime Minister Narendra Modia chuan nizana Delhi-a pawikhawihna rapthlak tak thlenga mawhphurtute chu hrem lohin chhuah an ni lo ang a ti.

<><><>

DAMPA BY-POLL

Dampa Assembly bial By-Election vote thlak chu boruak muanawm tak hnuiah zawhfel a ni a, vote tla hian zaa 80 a khum rin a ni.

Dampa bial by election Returning Officer Pu Malsawmzuala hnen atanga thudawn danin Dampa bial chhung polling station 41 ah te tluang takin mipui ten vote an thlak a, ruahman lawk angin polling station 39 ah te chuan tlai dar li khan mipui ten vote an thlak fel thei a, Silsuri 1 leh Marpara North polling station ah te tlai dar 5 leh minute 40 thleng khan vote an la thlak a ni.

Pu Malsawmzuala chuan vote tla zat hi ala hriat theih loh mahse zaa 83 vel anih an rin thu a sawi a, kum 2023 inthlanpuiah khan helai bialah hian vote zaa 86.23 a tla a ni.

Akashvani News Aizawl chuan Dampa Bial MLA inthlana vote thlakna hmun hrang hrang a tlawhkual a, harsatna leh buaina liantham awm loin tluang takin vote an thlak a; tun by election ah hian a tum khat nana vote thlak te pawh engemawzat an hmu a ni.

Akashvani News Aizawl-in Reiek khuaa polling station-te a tlawh kualnaah Election duty te chuan vote thlak laia harsatna thleng a awm lo an ti a, khawl Chiang lo awmna pawh awm bawh mahse vote thlak khaihlahk awm loin khawl hi a thara thlak a nih thu an sawi.

Kan corr sawi danin tun Dampa by election hi political party tin tan a pawimawh hle a, by election result hian political party tin tan kum 2028 MLA Inthlanpuia an dinhmun tur ah nghawng lian tak a nei dawn ni a ngaih a ni.

Puan tawh angin Dampa bial By- Election kalpui mekah hian Polling Station 41 awmin Polling station 40-ah hian webcasting kalpui niin Zopui Polling station-ah erawh kawlphehtha a luh loh avangin kalpui ve theih a nilo a ni. Dampa Constituency chhungah hian Critical Polling station Silsury I,II, III te an ni a. Dampa-ah hian vote awm zawng zawng zat hi 20888 a ni.

<><><>

POL PARTY REACTION

Dampa Bial Bye-election vote thlak ni vawiin khan Political Party hrang hrang te chu kan corr in a kawm kual a, tlin ngei an inrin thu an sawi hlawm a ni,

ZPM Vice President, Dampa bial by-election campaign chairman ni bawh Pu C. Lalnunnema chuan Dampa Bial mipui chevel bakah party worker te phur dan leh Party hruaitute thahnemngaihna enin ZPM candidate Pu Vanlalsailova chuan hnehna a chan ngei a rin thu a sawi a, Dampa Bial mipuite chuan sorkar mek an nihna leh kalphung thar mipui sorkar an nihna anga hma an lakna te an hmuh avangin ruling MLA neih ve duhna thinlung an nei lian hle a a hriat thu a sawi bawh a ni.

Byte: Pu C. Lalnunnema, ZPM

MNF Vice President Pu Lalchhandama Ralte chuan Dampa Bial by election a candidate tha tak tak karah MNF party candidate, an party senior Vice President ni bawh, Dr. R.Lalthangliana chu politics lama a

tawnhriat leh hun hman tawhte thlirin mipuite duh leh ngainat a hlawh dawna an hriat thu a sawi a, hei bakah hian sorkar lai chu sawi loh ang zela an awm avangin mipuiten an chhangkham tan tawh hle a an hriat thu sawiin, tun by-election neih mekah mipuiten warning pek nan an hmang dawn a a hriat thu a sawi a, tun inthlanah hian Pathian leh mipuite zarah MNF party chuan hnehna an chan ngei a rin thu sawiin, MNF in hlawhtlinna an chang a nih chuan kum 2028 inthlanpuia MNF sorkar leh theihna kawngah mipui thinlungah thu a sawi ngei a rin thu a sawi bawk a ni.

BJP Mizoram President Dr. K. Beichhua chuan Dampa bial by-election ah tling ngei turin theihtawp an chhuah avangin an candidate Pu Lalhmingthanga chu a tlin ngei an beisei thu a sawi a, an lo tling a nih chuan mipuite chu hmasawna duha an tuihal avangin BJP an vote tling nia a ngaih thu a sawi a, tu party tan pawh tun By-electionah hian tling kher lo pawhin vote share a pawimawh avangin kum 2028 Assembly inthlanpuiah an hlawkpui a rin thu a sawi a ni.

Congress Treasurer Dr. Lalmalsawma Nghaka chuan Dampa Bial By election ah hian Congress Party chu hmasawn nasa ber an nih thu khawtual mite'n an sawi a ti a, chu thli chuan Congress Party Candidate, an party Vice President ni bawk Pu John Rotluangliana pawh a tlin tir ngei an rin thu sawiin, Dampa biala an campaign naah mipuite chuan Congress Party chu an thutiamah an ding nghet a, an Policy an tihhlawhtlin thin avangin kum 2028 chu Congress hun a ni tawh an tih thu sawiin kum 2028 Assembly inthlanpui lo awm turah sorkarna siam thei ngei turin Congress Party chu an inbuatsaih mek tih a sawi a ni.

PC Party President Pu Vanlalruata ve thung chuan tun tum Dampa Bial By-election ah hian tlin an in ring lem lo a ti a, hetihlai hian he inthlanah an party in candidate an din tir nachhan chu hun kal zelah an party tan a that beisei vanga ti an nih thu a sawi a ni.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



BIHAR ELECTION

Bihar Assembly inthlan thawhnhnihna chu tluang takin vawiin khan zawh fel a ni a. Hriat theih chinah tlai dar 3 thleng khan vote zaa 60 a tla tawh. Inthlan thawhnhnihnaah hian district 20 huamchhunga Assembly bial 122 ah vote thlak a ni a. Voter vaibelchhe 3 leh nuai 70 chuang an awm a. Candidate hi an vaiin 1302 awmin an zingah hian hmeichhia 136 an tel a ni. Tukin dar 7 atang khan vote thlak tan a ni a, tlai dar 6 thleng vote thlakna hun hawn a ni a. Assembly bial 7 bikah chuan tlai dar 5 ah vote thlak hun khar a ni. Polling station 595 chu hmeichhiate vil tur bika ruahman a ni a. Polling booth 21 chu pianphunga rualbanlote enkawl tura dah a ni bawk a. Model Polling station hi 316 siam a ni. Tun tum inthlanah hian candidate langsar zingah Chief Minister Nitish Kumar te, JD(U) hruaitu hlun leh State Power Minister nilai Bijendra Prasad Yadav te an tel a.

Bihar Assembly inthlan vote tla te hi tun thla ni 14 ah chhiar a ni ang.

DELHI BLAST

Prime Minister Narendra Modia chuan nizana Delhi-a pawikhawihna rapthlak tak thlenga mawhphurtute chu hrem lohin chhuah an ni lo ang a ti. Vawiina Bhutan khawpui Thimpu-ah he thu hi sawiin agency te nen an inbiak pawh reng thu a sawi a. He pawikhawihna thleng hi a tawp thlenga chhui a tiam a ni.

Hetihlai hian vawiin khan Union Home Minister Amit Shah-a kaihhruaiin high-level security review meeting New Delhi-a a chenna inah neih a ni a. Red Fort kianga car puak chungchang leh venhimna kaihhnawihnte an sawiho a. He hunah hian Union Home Secretary, Director of the Intelligence Bureau, Delhi Police Commissioner, leh Director General of the National Investigation Agency (NIA) te an tel a ni.

Puan tawh angina nizan dar 7 vela New Delhi-a Lal Quila Metro Station bula car puak avangin mi 8 an thi a. Delhi Police Commissioner Satish Golcha sawi danin nizan dar 6:52 khan lirthei pakhat muangchanga red light-a a din hnu lawkah a puak zui nghal a. Hei hian a bul vela lirthei nasa takin a ti chhe bawk a. Hliam tuar mi 15 awmin a bulhnai damdawiinah hruai an ni.

